

Беришимиз 1000 сўм, орзуимиз Фирдавсми?



09:07 / 13.09.2021 2438

Аллоҳ таоло бизга ота-онамиздан меҳрибондир. Унинг қанчалик меҳрибонлигини тасаввур қила олмаймиз. Баъзи лутфининг, раҳматининг, ҳилмининг, сатрининг мисоллари бор.

У Зот шу қадар Меҳрибонки, эшикни ичидан беркитиб олиб, уй ичида гуноҳ қилаётган бўлсанг-да, ўлиб қолмаслигинг, тавба қилишга имконинг бўлиши учун эшик тирқишидан ҳавони киритиб туради.

Нақадар Карамлисан, Роббим!

- У Зот сизга мол беради.
- Кейин ўша молдан садақа қилишга сизни илҳомлантиради.
- Кейин ўша садақани оладиган фақирни сизга рўбарў қилади.
- Кейин ўша садақани сиздан қабул қилади.
- Кейин ўша садақа сабабли қолган молингизга барака беради.

Эй Роббим! Нақадар Карамлисан!

Сенга исён қилдик, Сен бизни сатр қилдинг.

Сени унутдик, Сен бизни унутмадинг.

Сенинг ғазабингни келтирадиган амал қилдик, Сен бизга раҳм қилдинг.

«Эй Аллоҳ, албатта, Сен Афувв, Каримсан. Афвни яхши кўрасан, бас, бизни афв этгин!»

Уйқудан уйғоняпмизми, демак, Аллоҳ таоло Ўзини зикр қилишимиз, Унга истиғфор айтиб, тавба қилишимиз, зулм қилган кишиларимиздан узр сўраб, розиликларини олишимиз, қарзларимизни ҳақдорларга қайтаришимиз, қазо намозларимизни ўқишимиз, қазо рўзаларимизни тутишимиз, ўлимга чин маънода тайёргарлик кўришимиз учун бизга имконият беряпти. Биз бор куч-ғайратимизни ишга солиб, бу фурсатдан фойдаланишимиз керак!!!

Агар Аллоҳ таоло бир бандасини яхши кўрса, унинг қалбини мулойим қилиб қўяди.

— Аллоҳ бир бандасини яхши кўриб қолса, нима қилади?

— Ўша банда хато қилган пайтда, уни истиғфор айтишга илҳомлантириб қўяди.

Садақа бераётганигда, бу киши пулимга муҳтож, демагин! Балки, Роббимнинг мағфиратига ва садақанинг савобига мен муҳтожман, дегин.

Бойларга қимматбаҳо совғалар бериб, фақирларга кийган кийимини берадиганлар тоифасидан бўлманг!

Муҳаммад Ратён

Агар садақа берувчи ўзининг бераётган садақаси фақирнинг қўлига етиб боришидан олдин Аллоҳнинг қўлига тушишини билганида эди, берувчи ҳис этадиган лаззат олувчи туядиган лаззатдан кўра каттароқ, кўпроқ бўларди.

Ибн Қаййим раҳимаҳуллоҳ

Баъзан садақа бераётганимизда ҳамёнимиздан эскироқ, қиймати озроқ пулни беришга ҳаракат қиламиз. Қўшнига егулик, либос садақа қилмоқчи бўлганимизда ортиб қолган, бироз эскирган таомни бериш, кийган либосини садақа қилиш ҳолати учрайди. Ўзимизга беришса ҳидланган таомни, эскирган либосни олармидик?!

Ўзимиз олишни орзу қиладиган даражадаги нарсаларни беришимиз лозим эмасми?! Меванинг, таомнинг, либоснинг энг сарасини беришимиз буюрилган. Беришимиз 1000 сўм, аммо унинг эвазига Фирдавс жаннатини орзу қиламиз. Аслида 1000 сўмни ихлос билан, риёдан холи ҳолатда берсак, Аллоҳ таоло фазли карами кенг Зот, бизга сўраганимизни беради, аммо бераётганда ўзимизга раво кўрганини берсак, комил иймон соҳиби бўлардик.

Анас ибн Молик розияллоҳу анҳудан ривоят қилинади

«Набий соллаллоҳу алайҳи васаллам: **«Сизлардан бирортангиз ўзи учун яхши кўрган нарсани биродари учун ҳам раво кўрмагунча мўмин бўла олмайди»**, дедилар».

Бешовларидан фақат Абу Довуд ривоят қилмаган.

Шарҳ: Бу ҳадисда ҳам комил иймон ҳақида сўз кетмоқда. Ҳадиси шарифнинг ўзиданоқ Ислом инсониятга яхшилиқни қанчалик раво кўрганини билиб олсак бўлади. Пайғамбаримиз соллаллоҳу алайҳи васаллам ҳар бир мўмин учун ўзидан бошқа кишиларга яхшилиқни раво кўришини иймон масаласи қилиб қўймоқдалар. Яъни, ҳеч ким ўзига яхши кўрган нарсани ўзгаларга ҳам раво кўрмагунча, комил мўмин бўла олмаслигини таъкидламоқдалар.

Садақанинг фойдалари:

Садақа – Аллоҳ таолога энг маҳбуб амаллардан;

Садақа – уни берувчидан ва унинг аҳлидан балонинг аришига, унинг ёмон ўлим топишдан қутулишига сабаб бўлади;

Садақа – баданни, молни поклайди;

Садақа – молнинг баракаси зиёда бўлиб, ризқ кенгайишига сабаб бўлади;

Садақа – ажрнинг кўпайишига сабаб бўлади;

Садақа – жаннатнинг махсус эшигидан киришга сабаб бўлади;

Садақа – молнинг зиёда бўлиб, камаймаслигига сабаб бўлади;

Садақа – дўзахдан қутулишга сабаб бўлади.

Эй Роббим, Сен Роҳмансан, Роҳиймсан! Ўзинг барчамизни садақа берувчилар ва унинг дунёю охиратдаги фойдаларини кўрувчилардан қилгин!

Ҳоний Довва мақоласи асосида

Нозимжон Ҳошимжон тайёрлади